

佛说善生子经 1 卷

No. 17 [No. 1(16), No. 16, No. 26(135)]

## 佛说善生子经

西晋沙门支法度译

闻如是：

一时，众佑游于罗阅耆阁崛山。彼时居士善生疾病困笃，勅其子曰：「吾没之后，汝必为六面礼。」于是善生他日殒命，子乃敬送供养丧事讫毕，輒早起沐浴，着新衣，之水上，拜谒六面而言曰：「余以恭肃敬，礼子于东方之生，彼又我敬焉。」周旋南方、西方、北方上下，面面同辞。

尔时，佛晨旦着衣持钵适欲入城，见居士善生子于水上六面拜谒如是，众佑则从而问曰：「居士子，汝何近闻，必当早起沐浴，着新衣，之水上，拜谒六面，自说：『恭肃敬礼拜于诸方』而又浴。彼之敬者，是何师法？善生子！」

善生子对曰：「吾父临亡，先有此令，是以遵行，不闻之于师也。」

众佑报曰：「居士子！父所言者非此六方也。旦而晞坐六面之欲，如有四面垢恶之行，不能悔者，则是身死，精神当生恶道地狱之中。夫人以四事为劳，当识知。何谓四？一为好杀生、二为好盗窃、三为淫邪行、四为喜妄语。」佛颂其义曰：

「杀生与盗窃，    欺诈为妄语，  
    趣向他人妇，    不为智者誉。」

「又，居士子！有四事或往恶道。何谓四？一为欲，二为怒，三为痴，四为畏。」颂其义曰：

「有欲怒痴畏，    不承受正法，  
是以名处下，    犹月阴遏亏。  
无欲怒痴畏，    而承受正法，  
是以名处上，    犹月阳进满。」

「又，居士子！有六患，消财入恶道，当识知。何谓六？一为嗜酒游逸、二为不时入他房、三为博戏游逸、四为大好伎乐、五为恶友、六为怠惰。」颂其义曰：

「饮酒入他房，    博戏好伎倡，  
恶友与怠惰，    圣哲所不称。」

「夫酒有六变，当知。何谓六？为消财、为致病、为兴争、为多怒、为失誉、为损智，已有斯恶则废事业，未致之财不获，既获者消，宿储耗尽。」

「淫邪有六变，当知。何谓六？不自护身、不护妻子、不护家属、以疑生恶、怨家得便、众苦所围，已有斯恶则废事业，未致之财不获，既获者消，宿储耗尽。」

「博戏有六变，当知。何谓六？胜则生怨、负则热中、朋友戚之、怨家快之、有狱凶忧、人众疑之，已有斯恶则废事业，未致之财不获，既获者消，宿储耗尽。」

「好乐有六变，当知。何谓六？志在舞、志在歌、志在弦、志在节、志在鼓、志在彼，已有斯恶则废事业，未致之财不获，既获者消，宿储耗尽。」

「恶友有六变，当知。何谓六？习醉迷、习昏乱、习纵恣、习酒舍、习小人、习鄙语，已有斯恶则废事业，未致之财不获，既获者消，宿储耗尽。」

「怠惰有六变，当知。何谓六？饱不作、饥不作、寒不作、热不作、晨不作、昏不作，已有斯恶则废事业，未致之财不获既获者消，宿储耗尽。」颂其义曰：

「好色乐歌舞，    昼息夜从彼，  
恶友与怠惰，    士为斯大损。  
博戏酒慌坏，    志在彼妇女，  
远贤而近愚，    其损犹月毁。」

行身自憍大，	毀蔑沙门道，
邪见而行慳，	是谓慢荡士。
夫酒妨财用，	少利饮大渴，
病水兴债负，	作乱危身疾。
或以酒结友，	或以酒犯法，
若以成美利，	斯有犹可忍。
或昼如奉戒，	昏夜道为姦，
常依于酒庐，	如此慎勿亲。
不自寒至暑，	如草不贵己，
精进修事业，	尔利是用损。
若能忍寒暑，	如草不贵己，
精进修事业，	则安且益矣。
狎下为渐消，	习上未曾损，
进善超然尊，	以善必得善。
大善则遘善，	诚善能兼习，
亲戚之所尚，	奉戒以灭恶。
是以当为习，	已有行复行，
其为亲戚上，	如帝莅于众。

「又，居士子！有<sup>有</sup>四友非友像，当识知。何谓四？一为取异物，二为言佞，三为面爱，四为邪教。」颂其义曰：

「取异物之友，	言美以顺耳，
面谈为媚爱，	邪教相危殆。
斯以非友像，	智者则不友，
已识当远离，	譬犹出涩道。

「取异物之友，当以四事知。何谓四？贪取彼物、与少望多、为畏故习、为利故习。」颂其义曰：

「夫以取彼物，	少与而多欲，
畏习与利习，	贪人友际然。
斯以非友像，	智者所不友，
已识当远离，	譬犹出涩道。

「言佞之友，当以四事知。何谓四？宣人之私、自隐其私、面伪称善、退则兴诽。」颂其义曰：

「好行宣人私，        有私而自隐，  
面从褒扬善，        退则议其恶。  
斯以非友像，        智者所不友，  
已识当远离，        譬犹出涩道。」

「面爱之友，当以四事知，何谓四？说人往短、阴求来过、与之不宝、欲人有厄。」颂其义曰：

「为于不可为，        不利造妄语，  
与而不为宝，        愿人厄请已。  
斯以非友像，        智者所不友，  
已识当远离，        譬犹出涩道。」

「邪教之友，当以四事知。何谓四？以杀生之事劝化人，以盗窃、以淫邪、欺诈之事劝化人。」颂其义曰：

「杀生与盗窃，        欺诈为妄语，  
趣向他人妇，        以此劝立人。  
斯以非友像，        智者所不友，  
已识当远离，        譬犹出涩道。」

「又，居士子！有四友，为仁明欲利人，当识知。何谓四？一为同苦乐、二为利相掇、三为与本业、四为仁愍伤。」颂其义曰：

「与人同安危，        掇之以善利，  
为厚能业人，        哀愍导正道。  
如斯为友像，        智者所习讽，  
当与此从事，        必益不为恶。」

「同苦乐之友，当以四事知。何谓四？施之以己所宝、施之以妻子利、施之家所有、言忠为忍言。」颂其义曰：

「与其利己者，        有财利亦与，  
与以家之利，        言忠为忍言。」

如斯为友像，    智者所习亲，  
当与此从事，    必益不为恶。

「利相掇之友，当以四事知。何谓四？彼私不宣、己私不隐、面说善言、还为弭谤。」颂其义曰：

「以不宣彼私，    己私不为隐，  
相见语讲善，    还则弭诽谤。  
如斯为友像，    智者所习亲，  
当与此从事，    必益不为恶。」

「与本业之友，当以四事知。何谓四？以利业之、以力业之、纵恣谏之、以善养之。」颂其义曰：

「业之以财利，    以力助安之，  
切磋其纵恣，    将养其善志。  
如斯为友像，    智者所习亲，  
当与此从事，    必益不为恶。」

「仁愍伤之友，当以四事知。何谓四？教劝竖立以成其信、成其戒、成其闻、成其施。」颂其义曰：

「信戒闻施道，    恒以劝化人，  
如斯为友像，    智者所习亲。  
当与此从事，    必益不为恶。」

「又，居士子！夫东面者，犹子之见父母也。是以子当以五事正敬、正养、正安父母。何谓五？念思惟报家事，唯修责负，唯解勅戒，唯从供养，唯欢父母。父母又当以五事爱哀其子。何谓五？兴造基业，与谋利事，与娉妇，教学经道经，则以所有付授与子。是为东方二分所欲者，得古圣制法，为子必孝、为父母慈爱，士丈夫望益，而善法不衰。」

「夫南面者，犹弟子之见师也。是以弟子当以五事正敬、正养、正安于师。何谓五？必审于闻，必爱于学，必敏于事，必无过行，必供养师。师又当以五事哀教弟子。何谓五？以学学之，极艺教之，使敏于学，导以善道，示属贤友。是为南方二分所欲者，得古圣制法，为弟子谦，师以仁教，士丈夫望益，而善法不衰。」

「夫西面者，犹夫之见妇也。是以夫当以五事正敬、正养、正安其妇。何谓五？正心敬之，不恨其意，不有他情，时与衣食，时与宝饰。妇又当以十四事事于夫。何谓十四？善作为，善为成，受付审，晨起，夜息，事必学，阖门待君子，君子归问讯，辞气和，言语顺，正几席，洁饮食，念布施，供养夫。是为西方二分所欲者，得古圣制法、夫妇之宜，士夫望益，而善法不衰。

「夫北面者，犹友见其朋也。是以友当以五事正敬、正养、正安朋类。何谓五？正心敬之，不恨其意，不有他情，时时分味，恩厚不置。朋类又当以五事摄取其友。何谓五？有畏使归我，遨逸则数责，私事则为隐，供养久益胜，言忠为忍言。是为北方二分所欲者，得古圣制法、朋友之交，士丈夫望益，而善法不衰。

「夫下面者，犹长子之见奴客执事也。是以长子当以五事正敬、正养、正安奴客执事。何谓五？适力使之，用时衣食，时时分味，时时教斋，疾病息之。奴客执事又当以十事供养长子。何谓十？善作为，善为成，受付审，夜卧，早作，凡事必学，作务勤力，家贫不慢，空乏不离，出门称曰我家长子聪而有慧。是为下方二分所欲者，得古圣制法、长子执事之宜，士丈夫望益，而善法不衰。

「夫上面者，犹居家布施之人之见沙门梵志也。是以居之来当以五事正敬、正养、正安沙门梵志。何谓五？开门待之，来迎问讯，与设几席，经法藏护，施食洁净；以是供养沙门梵志。沙门梵志又当以五事答布施家。何谓五？教诲以成其正信，教诲以成其戒行，教诲以成其多闻，教诲以成其布施，教诲以成其智慧。是为上方二分所欲者，得古圣制法、居家及沙门梵志之宜，士丈夫望益，而善法不衰。」颂其义曰：

「东面为父母，	师教宜南面，
西面为子妇，	朋友位北面，
奴客执事下，	沙门梵志上，
如此应为礼，	亦为居家宜。
凡人富有财，	当念以利人，
与人同财利，	布施者升天。
得利与人共，	在在获所安，
义摄世间者，	斯为近乐本。

夫以恩摄人，  
善摄护天下，  
上得处众会，  
成人之信戒，  
意与常不惰，  
摄人以友事，  
往来而又往，  
夫能修慎身，  
居积宝货者，  
先学为最胜，  
若索以得财，  
一分供衣食，  
藏一为储峙，  
为农商养牛，  
次五严治室，  
如是货乃积，  
夫财日夜聚，  
治产求以渐，  
有财无与富，  
慳吝及恶业，  
事中用则学，  
观夫用事者，  
其于族亲中，  
与亲众座安，  
如母之为子，  
其福数数及。  
能益利与安，  
必使得名闻。  
舍弃慳吝行，  
饮食相惠施。  
如是名不亏，  
斯居家为贤。  
当兴为仁义，  
次乃为治产。  
当常作四分，  
二为本求利，  
厄时可救之，  
畜羊业有四，  
第六可娉娶，  
日日寻益增。  
如流归于海，  
喻若蜂作蜜。  
又无与边方，  
有力无与友。  
不用勿自妨，  
明好犹炽火。  
乃兼为两好，  
如释处天宫。」

于是善生子闻众佑说已，即稽首佛足，下起绕三匝，欣然自归，从佛受戒。

## 佛说善生子经

---

【经文信息】大正藏第 01 册 No. 0017 善生子经

【版本记录】CBETA 电子佛典 Rev. 1.15 (Big5)，完成日期：2010/02/26

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，张文明大德提供，北美某大德提供，法雨道场提供新式标点

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】

---